



Broj: 02-50-1-16-17/08

Sarajevo: 15.5. i 17. 6.2008. godine

ZAPISNIK

**17. sjednice Doma naroda
Parlamentarne skupštine Bosne i Hercegovine,
održane 15.5. i 17.6.2008.godine**

Sjednica je počela u 14,15 sati.

Sjednicom je predsjedavao Mladen Ivanić, prvi zamjenik predsjedavajućeg Doma naroda Parlamentarne skupštine BiH.

Sjednici je prisustvovalo 13 delegata.

Delegati Sulejman Tihić i Hilmo Neimarlija opravdali su odsustvo.

Osim delegata, na sjednici Doma naroda bili su predstavnici: Vijeća ministara BiH, međunarodnih organizacija i sredstava javnog informiranja.

Nakon rasprave u kojoj su učestvovali: Ilija Filipović, Hazim Rančić, Mladen Ivanić, Alma Čolo, Rudo Vidović, Ivo Miro Jović, Branko Zrno, Adem Ibrahimpašić, Božo Rajić, Slobodan Šaraba, Dom naroda je većinom glasova usvojio sljedeći izmijenjeni

DNEVNI RED

1. Odgovori na delegatska pitanja i delegatska pitanja;
2. Usvajanje Zapisnika 16. sjednice Doma naroda;
3. Prijedlog zaključaka delegata u Doma naroda PSBiH razmatranih na 8. zajedničkoj sjednici Doma naroda i Predstavničkog doma PSBiH a u vezi s poslovanjem Javnog RTV servisa BiH i mjerama za prevladavanje stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006. godinu;
4. Prijedlog zakona o Fiskalnom vijeću BiH (drugo čitanje), predlagač: Vijeće ministara BiH;
5. Prijedlog okvirnog zakona o zaštiti i spašavanju ljudi i materijalnih dobara od prirodnih ili drugih nesreća u Bosni i Hercegovini (drugo čitanje), predlagač: Vijeće ministara BiH;
6. Prijedlog zakona o poljoprivredi, ishrani i ruralnom razvoju BiH (drugo čitanje), predlagač: Vijeće ministara BiH;
7. Prijedlog zakona o izmjenama i dopunama Zakona o polaganju pravosudnog ispita u Bosni i Hercegovini (prvo čitanje) predlagač : Vijeće ministara BiH;
8. Prijedlog zakona o Agenciji za identifikacione dokumente, evidenciju i razmjenu podataka BiH (prvo čitanje), predlagač Vijeće ministara BiH;
9. Prijedlog zakona o izmjenama i dopunama Zakona o policijskim službenicima BiH (prvo čitanje), predlagač Vijeće ministara BiH;
10. Informacija o stanju sigurnosti u Bosni i Hercegovini u 2007. godini;
11. Informacija o radu Tužilaštava BiH za 2007.godinu;
12. Izvještaj o radu Pravobranilaštva BiH za period od 1.1.2007. do 31.12.2007.;

13. Izvještaj o zaštiti ličnih podataka u Bosni i Hercegovini i o radu Komisije za zaštitu podataka za 2007. godinu;
14. Izvještaj o radu Ureda za razmatranje žalbi u 2007. godini;
15. Izvještaj o radu i finansijski izvještaj Agencije za poštanski saobraćaj BiH za period od 1.1.2007. do 31.12.2007.;
16. Izvještaj o radu Upravnog odbora Izvozno-kreditne agencije BiH;
17. Godišnji izvještaj Centralne banke BiH za 2007. godinu;
18. Finansijski izvještaj Centralne banke BiH za 2007. godinu;
19. Razmatranje Programa mjera za primjenu Sporazuma CEFTA;
20. Razmatranje izvještaja o radu komisija Doma naroda za 2007. godinu:
 - a. Komisije za finansije i budžet,
 - b. Ustavnopravne komisije,
 - c. Komisije za vanjsku i trgovinsku politiku, carine, saobraćaj i komunikacije;
21. Davanje saglasnosti za ratifikaciju Okvirnog sporazuma između Bosne i Hercegovine i Evropske investicione banke kojim se reguliraju aktivnosti Evropske investicione banke u Bosni i Hercegovini;
22. Davanje saglasnosti za ratifikaciju Sporazuma o saradnji u oblasti odbrane između Vijeća ministara BiH i Vlade Republike Grčke;
23. Davanje saglasnosti za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austria Creditanstalt AG – projekat rekonstrukcije i proširenja vodovodnog sistema u općini Posušje;
24. Davanje saglasnosti za ratifikaciju Ugovora o zajmu – Reorganizacija projekta obnove elektroenergetskog sistema – između Bosne i Hercegovine i Evropske banke za obnovu i razvoj;
25. Davanje saglasnosti za ratifikaciju Ugovora o amandmanu, kojim se vrše izmjene i dopune Ugovora o zajmu od 2. novembra 2000. amandmanima od 5. decembra 2001. i 23. februara 2004. – između Bosne i Hercegovine i Evropske banke za obnovu i razvoj;
26. Davanje saglasnosti za ratifikaciju Konvencije o pristupu informacijama, učešće javnosti u odlučivanju i pristupu pravdi u pitanjima zaštite okoliša;
27. Davanje saglasnosti za ratifikaciju Fakultativnog protokola uz Konvenciju protiv mučenja i drugih okrutnih, neljudskih ili ponižavajućih postupaka ili kažnjavanja.

Ad.1. Odgovori na delegatska pitanja i delegatska pitanja

Odgovor na delegatsko pitanje dobili su: Dušanka Majkić, na pitanje postavljeno na 12. sjednici, Zoran Koprivica, na pitanje postavljeno na 14. sjednici, Sulejman Tihić, na pitanje postavljeno na 15. sjednici, Ivo Miro Jović, na pitanje postavljeno na 15. sjednici, odgovor na delegatsko pitanje postavljeno na 14. sjednici Doma naroda dobio je delegat Slobodan Šaraba i Adem Ibrahimpašić na pitanje postavljeno na 1. posebnoj sjednici oba doma.

Delegati Dušanka Majkić, Zoran Koprivica i Slobodan Šaraba izjasnili su se da su zadovoljni dobivenim odgovorima.

Delegat Ivo Miro Jović izjasnio se da nije zadovoljan dobivenim odgovorom dok se delegat Adem Ibrahimpašić izjasnio da nije zadovoljan dobivenim odgovorom te je tražio da se i zapisnički konstatira da nema političke volje za izmjenama Zakona o akcizama što bi dovelo do zaštite domaće proizvodnje.

Delegat Dušanka Majkić postavila je sljedeće pitanje Direkciji za evropske integracije BiH:

„Poznato je da preuzimanje *acquis communautaire*, odnosno usklađivanje zakonodavstva s njegovim odredbama, predstavlja najkompleksniji i najdugotrajniji posao u cjelokupnom procesu evropskih integracija, u kojem učestvuju gotovo sve institucije jedne zemlje. Posebna uloga u procesu usklađivanja pravnog sistema BiH s odredbama komunitarnog prava pripada Parlamentarnoj skupštini BiH. Da bi se postigli najoptimalniji rezultati, smatram da je neophodno ostvariti visok stepen koordinacije kroz stalnu saradnju između odgovarajućih parlamentarnih komisija i Direkcije za evropske integracije.

- pitanje glasi:

“Šta je do sada učinjeno na izradi mehanizama i procedura za uspostavljanje koordinacije i stalne saradnje između odgovarajućih parlamentarnih komisija oba doma Parlamentarne skupštine BiH i Direkcije za evropske integracije u vezi sa usklađivanjem zakonodavstva BiH sa *acquis communautaire*om?”

Delegat Branko Zrno postavio je sljedeće pitanje Vijeću ministara - Ministarstvu civilnih poslova BiH:

„Zašto se, uporno, u diplomatski pasoš unosi viza na šest mjeseci? Da li je riječ o propisu, odluci, zakonskoj odredbi ili prihvaćenoj praksi MVP-a? Da li se, ako je riječ o odluci, zakonskoj odredbi ili prihvaćenoj praksi, postupak odnosi na sve službene pasoše ili samo na neke?”

Ovakva praksa otežava, ponekad onemogućava dobivanje vize drugih zemlja na period od šest mjeseci. Nelogično je i, u najmanju ruku, neprimjereno na ovakav način omalovažavati i službeni dokument i njegovog nosioca. “

Delegat Rudo Vidović postavio je sljedeće pitanje Vijeću ministara BiH:

„Poznato je da će se uskoro biti potpisan Sporazum o stabilizaciji i pridruživanju s Evropskom unijom, te da će od tog trenutka početi intenzivnije aktivnosti i ispunjavanje uslova pod kojim država kandidatkinja pristupa Evropskoj uniji, a koji se, između ostalog, odnose na obavezu preuzimanja cijele pravne tečevine Evropske unije.

Isto tako poznata su iskustva zemalja koje već imaju status kandidata (a posjeta naše Zajedničke komisije za evropske integracije Saboru Republike Hrvatske to potvrđuje) koja govore da se elementi pravne tečevine Evropske unije (podijeljena u desetine poglavlja) ogledaju kroz:

- primarno zakonodavstvo – osnivački ugovori
- sekundarno zakonodavstvo – uredbe, direktive, odluke, preporuke i mišljenja
- druge izvore prava – presude suda EZ-a, opći principi prava, međunarodni ugovori
- ostale akte – rezolucije, izjave, preporuke, smjernice, zajedničke akcije, zajedničke stavove itd.

Da bi svi ti poslovi bili urađeni u predviđenim rokovima, iskustva govore da je neophodno angažirati veliki broj stručnjaka koji poznaju evropsko zakonodavstvo i koji su školovani u Evropskoj uniji.

Pitanje glasi:

Da li se za tu potrebu planira školovanje naših kadrova u Evropskoj uniji i da li su eventualno osigurana novčana sredstva za njihovo stipendiranje.?”

Delegat Slobodan Šaraba postavio je sljedeće pitanje OHR-u:

Šta namjerava uraditi visoki predstavnik u BiH u vezi sa smijenjenim licima (koja su smijenjena odlukom ranijih visokih predstavnika), budući da su im uskraćena osnovna ljudska i građanska prava (pravo na rad) i da su tako postali građani drugog reda?“

Delegat Drago Ljubičić postavio je sljedeće pitanje Vijeću ministara BiH:

„Kakva je nacionalna struktura zaposlenih u Direkciji za ekonomsko planiranje? Posebno iskazati nacionalnu strukturu rukovodećih lica na nivou Direkcije, na nivou sektora, na nivou odjela i posebno ostalih zaposlenih?“

Ad. 2. Usvajanje Zapisnika 16. sjednice Doma naroda

Rasprava o ovoj tački dnevnog reda nije vođena.

Dom naroda jednoglasno je usvojio Zapisnik 16. sjednice Doma naroda.

Ad. 3. Prijedlog zaključaka delegata Doma naroda PSBiH razmatranih na 8. zajedničkoj sjednici Doma naroda i Predstavničkog doma PSBiH a u vezi s poslovanjem Javnog RTV servisa BiH i mjerama za prevladavanje stanja utvrđenog revizorskim izvještajima o finansijskom poslovanju Javnog RTV servisa BiH za 2005. i 2006. godinu.

U raspravi o ovoj tački dnevnog reda učestvovali su: Hazim Rančić, Alma Čolo, Ilija Filipović, Dušanka Majkić, Adem Ibrahimpašić, Božo Rajić, Ivo Miro Jović, Mladen Ivanić, Branko Zrno, Zoran Koprivica i Rudo Vidović.

Delegat Hazim Rančić rekao je da je Kolegij Doma naroda, suprotno stavu Kluba delegata bošnjačkog naroda i suprotno Poslovniku Doma naroda Parlamentarne skupštine BiH, spornu tačku 3. dnevnog reda uvrstio u dnevni red sjednice Doma.

Također je rekao da smatra da je Kolegij Doma naroda Parlamentarne skupštine BiH, protivno zaključku sa 8. zajedničke sjednice, onemogućio nadležnu komisiju da razmotri sve predložene zaključke na zajedničkoj sjednici, te time onemogućio i komisiju i delegate da ravnopravno odlučuju o svim predloženim zaključcima sa 8. zajedničke sjednice oba doma Parlamentarne skupštine BiH.

Prema mišljenju Kluba delegata bošnjačkog naroda, prvi zamjenik predsjedavajućeg Doma naroda krši odredbe Poslovnika Doma naroda činjenicom da omogućava da se van utvrđenog dnevnog reda odlučuje o novom zaključku koji je podnio delegat Ilija Filipović pod brojem 02-50-1-16-17/08, od 15.5.2008. Navedeni zaključak razlikuje se od zaključka istog delegata pod brojem 01,02-50-1-18-8/08, od 23.4.2008. Prema mišljenju Kluba delegata bošnjačkog naroda, ovakve izmjene nisu dozvoljene, niti su ispoštovane ostale proceduralne faze predviđene Poslovnikom Doma naroda.

Hazim Rančić rekao je, u ime Kluba delegata bošnjačkog naroda, da smatra 3. tačku zaključka delegata Ilije Filipovića štetnom po vitalni nacionalni interes bošnjačkog naroda.

Delegat Ilija Filipović rekao je da je zaključak pod brojem 02-50-1-16-17/08, od 15.5.2008., samo modificirana verzija zaključka pod brojem 01,02-50-1-18-8/08, od 23.4.2008.

Klub delegata hrvatskog naroda smatra da je argumentacija Kluba delegata bošnjačkog naroda neprihvatljiva i neutemeljena.

Prvi zamjenik predsjedavajućeg Doma naroda Parlamentarne skupštine BiH Mladen Ivanić osporio je navod delegata Hazima Rančića da krši odredbe Poslovnika Doma naroda, navodeći da je u potpunosti ispoštovao odredbe Poslovnika.

Klub delegata srpskog naroda smatra da sporna tačka 3. zaključka delegata Ilije Filipovića nije štetna po vitalni nacionalni interes bošnjačkog naroda.

Nakon rasprave u kojoj su učestvovali pomenuti delegati, Klub delegata bošnjačkog naroda pozvao se na vitalni nacionalni interes, nakon čega je rasprava o zaključku prekinuta te se pristupilo glasanju.

Prvo se glasalo o tome da li je treća tačka zaključka delegata Ilije Filipovića, koja glasi: „Dom naroda Parlamentarne skupštine BiH obavezuje Vijeće ministara BiH da pokrene postupak osnivanja novog RTV kanala na hrvatskom jeziku, unutar Javnog RTV servisa BiH, na osnovu odredbi člana 9. stav 2. Zakona o javnom radiotelevizijskom sistemu BiH”, **štetna po vitalni nacionalni interes bošnjačkog naroda.**

Klub delegata bošnjačkog naroda, sa tri glasa „za”, izjasnio se da smatra spornu tačku zaključka štetnom po vitalni nacionalni interes bošnjačkog naroda.

Klub delegata hrvatskog naroda, sa pet glasova „protiv”, izjasnio se da ne smatra spornu tačku zaključka štetnom po vitalni nacionalni interes bošnjačkog naroda.

Klub delegata srpskog naroda, sa pet glasova „protiv”, izjasnio se da ne smatra spornu tačku zaključka štetnom po vitalni nacionalni interes bošnjačkog naroda.

Nije postignuta saglasnost o pokretanju pitanja vitalnog nacionalnog interesa, te je, u skladu s članom 162. Poslovnika Doma naroda, osnovana Zajednička komisija za rješavanje vitalnog nacionalnog interesa za čije članove su izabrani: Hazim Rančić iz Kluba delegata bošnjačkog naroda, Ilija Filipović iz Kluba delegata hrvatskog naroda te Zoran Koprivica iz Kluba delegata srpskog naroda.

Nakon izjašnjavanja o štetnosti sporne tačke po vitalni nacionalni interes, pristupilo se glasanju o sljedećim tačkama zaključka delegata Ilije Filipovića:

1. „Dom naroda Parlamentarne skupštine BiH neupitno se zalaže za zakonito i stabilno poslovanje javnih emitera i snažno podržava istinito, cjelovito, nepristrasno, pravedno i pravovremeno informiranje javnosti o svim događajima u Bosni i Hercegovini i ostvarivanje prava informiranja javnosti, ravnopravno na jezicima sva tri konstitutivna naroda u Bosni i Hercegovini u duhu međunarodnih i evropskih propisa i standarda, kao i odredbi Ustava BiH.“
2. „Dom naroda Parlamentarne skupštine BiH smatra da je bitan uslov jednakopravnosti naroda i građana Bosne i Hercegovine i da je to jedan od osnovnih opstanaka samoodrživosti i dugoročne stabilnosti zemlje“.

Tačka 1. zaključka **usvojena** je sa 10 glasova „za“ i tri „suzdržana“ glasa, a tačka 2. zaključka **usvojena** je sa 10 glasova „za“ i tri „suzdržana“ glasa.

S obzirom da je povučeno pitanje vitalnog nacionalnog interesa, nije se glasalo o tački 3. zaključka delegata Ilije Filipovića.

Nakon izjašnjavanja o zaključku delegata Ilije Filipovića, pristupilo se glasanju o sljedećem zaključku delegata Adema Ibrahimpašića:

1. „U potpunosti provesti Zakon o javnom RTV sistemu i Zakon o RTV servisu. Za realizaciju ovog zaključka zadužiti Ministarstvo komunikacija i prometa BiH.“
2. „Zadužiti Vijeće ministara BiH da u narednih pet godina iz budžeta osigura 56.000.000 KM za ulaganje u digitalizaciju prijenosne i produkcijske mreže.“
3. „Povećati RTV taksu na minimalno 10 KM radi stabilizacije poslovanja i sanacije dugova.“

Tačka 1. zaključka, sa tri glasa „za“, devet glasova „protiv“ i jednim „suzdržanim“ glasom, **nije usvojena**, tačka 2. zaključka, sa tri glasa „za“ i deset glasova „protiv“, **nije usvojena**, i treća tačka zaključka, također s jednim glasom „za“, deset glasova „protiv“ i dva „suzdržana“ glasa, **nije usvojena**.

Ad. 4. Prijedlog zakona o Fiskalnom vijeću BiH (drugo čitanje), predlagač: Vijeće ministara BiH

Rasprava o ovoj tački dnevnog reda nije vođena.

Dom naroda je, sa 12 glasova „za“ i jednim glasom „protiv“, usvojio Zakon o Fiskalnom vijeću BiH u predloženom tekstu.

Ad.5. Prijedlog okvirnog zakona o zaštiti i spašavanju ljudi i materijalnih dobara od prirodnih ili drugih nesreća u Bosni i Hercegovini (drugo čitanje), predlagač: Vijeće ministara BiH

U raspravi o ovoj tački dnevnog reda učestvovala je Slobodan Šaraba.

Dom naroda jednoglasno je usvojio Okvirni zakon o zaštiti i spašavanju ljudi i materijalnih dobara od prirodnih ili drugih nesreća u Bosni i Hercegovini s dva sljedeća amandmana koji su identični amandmanima usvojenim u Predstavničkom domu.

Amandman I.

Član 9. stav (2) mijenja se i glasi :

„Pripadnici profesionalnih snaga zaštite i spašavanja mogu biti upućeni kao pomoć u druge države. Pripadnici dobrovoljnih snaga zaštite i spašavanja mogu biti upućeni kao pomoć u druge države isključivo uz dobrovoljni pristanak, koji daju u pisanom obliku“.

Amandman II.

Član 25. stav (4) mijenja se i glasi:

„Entiteti i Brčko Distrikt će svoje zakone o civilnoj zaštiti i spašavanju i druge propise donijeti i uskladiti s odredbama ovog zakona u roku od godine dana od dana stupanja na snagu ovog zakona.“

Ad. 6. Prijedlog zakona o poljoprivredi, ishrani i ruralnom razvoju BiH, (drugo čitanje), predlagač: Vijeće ministara BiH

U raspravi o ovoj tački dnevnog reda učestvovali su Alma Čolo i Slobodan Šaraba.

Dom naroda je, sa 12 glasova „za“ i jednim glasom „protiv“, usvojio Zakon o poljoprivredi, ishrani i ruralnom razvoju BiH sa 17 amandmana koji su identični amandmanima usvojenim u Predstavničkom domu:

Amandman I.

U članu 1. stav (1) iza tačke d) dodaje se nova tačka e) koja glasi: „
e) utvrdi okvirne ciljeve sektora poljoprivrede i ruralnog razvoja i definira okvirne mjere koje su potrebne za njihovo ostvarenje“.

Amandman II.

U član 3. tačka c) mijenja se i glasi:

„c) „Poljoprivredno gazdinstvo” podrazumijeva proizvodnu jedinicu, i s tehničkog i privrednog gledišta, kojom se jednoobrazno rukovodi i koja se bavi proizvodnjom poljoprivrednih proizvoda; ili održava zemljište, koje se više ne koristi za proizvodnju, u dobrom poljoprivrednom i okolišnom stanju. Gazdinstvo se može baviti i drugim dodatnim (nepoljoprivrednim) proizvodnim i uslužnim djelatnostima.

U ostalom dijelu teksta Zakona uskladiti terminologiju kao u tački c) u različitim padežima.

U istom članu u tački i) iza riječi “diverzificiranja” u zagradi napisati značenje riječi koje glasi “(raznolikosti)”

U istom članu iza tačke l) dodaju se nove tačke :“m) , n), o) i p) koje glase:

m) “Ishrana” podrazumijeva pristup i raspoloživost visokokvalitetne i zdravstveno ispravne hrane, odnosno svake materije ili proizvoda prerađenog, djelimično prerađenog ili neprerađenog, a namijenjenog konzumiranju ljudi ili se može očekivati da će ga ljudi konzumirati i odnosi se na sve proizvode agroindustrijskog kompleksa od njive do trpeze.

n) „Autohtona vrsta i pasmine životinja” podrazumijeva skup životinja iste vrste, koje se, zbog zajedničkog porijekla i prilagođavanja specifičnim životnim prilikama, međusobno podudaraju u značajnim pasminskim oznakama i svojstvima, morfološke i fiziološke prirode. Ta svojstva životinje jedne pasminske grupe moraju sigurno prenositi na svoje potomstvo.

o) „Tradicionalna proizvodnja i tradicionalni proizvod na bazi biljnih i životinjskih komponenti” podrazumijeva proizvodnju biljnih, životinjskih i proizvoda na bazi bilja i životinjskih supstanci, koja se, u odnosu na konvencionalnu proizvodnju, razlikuje po načinu proizvodnog procesa, a u skladu s dobrom proizvođačkom praksom i bez obzira na mjesto porijekla. Tradicionalni proizvod je proizvod koji, u odnosu na slične proizvode iste kategorije, ima karakteristike koje ga razlikuju od ostalih konvencionalnih proizvoda, bez obzira na mjesto porijekla. Tradicionalni proizvod mora biti sačinjen od tradicionalne sirovine ili imati tradicionalan sastav ili tradicionalan način proizvodnje i/ili prerade.“

p)“ Sljedivost” (mogućnost praćenja) je mogućnost ulaženja u trag hrani, hrani za životinje, životinji koja proizvodi hranu, odnosno služi za proizvodnju hrane, sirovini ili materiji koja je namijenjena ugrađivanju ili se očekuje da će biti ugrađena u hranu ili hranu za životinje, kroz sve faze proizvodnje, prerade i distribucije.“

Amandman III.

Član 4. stav (1) tačka a) mijenja se i glasi:

„a) aktiviranje neiskorištenih prirodnih i ljudskih resursa, razvoj održivog, konkurentnog i dinamičnog sektora poljoprivrede, šumarstva i ishrane“,

Iza tačke a) dodaje se nova tačka b) koja glasi:

„b) povećanje stepena zadovoljavanja potreba stanovništva vlastitom hranom i supstitucija uvoza hrane domaćom proizvodnjom za koju postoje prirodni i drugi uslovi te smanjenje vanjskotrgovinskog deficita poljoprivredno-prehrambenih proizvoda“,

Dosadašnje tačke b), c), d) i e) postaju tačke c), d), e) i f).

U istom članu iza tačke f) dodaje se nova tačka g) koja glasi:

„g) omogućavanje primjerenog životnog standarda i pridonosenje stabilnosti poljoprivrednog dohotka i prehrambene sigurnosti stanovništva koje se podmiruje u što većoj mjeri domaćim konkurentnim poljoprivrednim proizvodima“.

Amandman IV.

U članu 10. stav (1) tačka c) mijenja se i glasi:“ Ured za harmonizaciju i koordinaciju sistema plaćanja.”

Kroz cijeli tekst Zakona u različitim padežima riječi: "Uprava za harmonizaciju sistema plaćanja" zamjenjuju se riječima: „Ured za harmonizaciju i koordinaciju sistema plaćanja.”

Amandman V.

U članu 12. stav (13) u tački e) iza riječi: „saradnji sa“ dodaju se riječi:“ Uredom za harmonizaciju i koordinaciju sistema plaćanja“, a preostali dio teksta briše se.

U istom članu 12. stav (13) tačka h) ispred riječi „priprema“ dodaju se riječi: u saradnji s nadležnim organima entiteta i Brčko Distrikta BiH“, a ostali dio teksta nastavlja se.

Amandman VI.

„Član 13.(Odgovornost i obaveze za harmonizaciju sistema plaćanja) mijenja se i glasi:

(1) S ciljem osiguranja harmonizacije sistema plaćanja koje obavljaju nadležni organi entiteta i Brčko Distrikta BiH, u svrhu podrške mjerama politike u sektoru poljoprivrede, ishrane i ruralnog razvoja, Ministarstvo je odgovorno za dosljednost, transparentnost i koordinaciju sistema plaćanja.

(2) S ciljem jačanja i harmoniziranja postojećih sistema plaćanja, praksi i procedura u entitetima i Brčko Distriktu BiH, Ministarstvo obavlja sljedeće zadatke:

a) u saradnji s nadležnim organima entiteta i Brčko Distrikta BiH, razvija pravni okvir za uspostavljanje i razvoj institucionalnih struktura za podršku u provođenju mjera politike i privlačenja sredstava EU i sredstava iz drugih međunarodnih fondova,

b) uspostavlja jedinstvene prakse i procedure funkcija odobravanja, izvršenja i računovodstvenih transakcija u sektoru poljoprivrede, ishrane i ruralnog razvoja, koje će biti primijenjene u entitetima i Brčko Distriktu BiH,

c) usaglašava sistem upravne kontrole u saradnji s nadležnim organima entiteta i Brčko Distrikta BiH, koji će osigurati transparentnost i dostupnost podataka o svim mjerama podrške i isplatama,

d) u saradnji s nadležnom organima entiteta i Brčko Distrikta BiH, uspostavlja funkcije kontrole,

e) promovira ujednačenu primjenu procedura za isplate i zahtjeve na svim nivoima, a koji su u skladu s pravilima EU,

f) koordinira obuku osoblja na svim nivoima kako bi se osigurala jedinstvena primjena procedura i ispravno provođenje mjera,

g) pruža pomoć u uspostavljanju registara iz člana 15. ovog zakona i drugih evidencija i koordinira rad odgovarajućih službi tehničkih timova na svim nivoima u svrhu konzistentne primjene sistema referentne registracije i sistema skladištenja podataka u okviru sveobuhvatnog tehničkog okvira,

- h) ostvaruje komunikaciju s platnim organizacijama i drugim internim i eksternim organima u pogledu procedura i razmjene podataka u statističke i druge svrhe po zahtjevu,
- i) uspostavlja efektivni harmonizirani sistem monitoringa i evaluacije u skladu s najboljom evropskom praksom,
- j) identificira i pomaže u razvoju drugih relevantnih službi s ciljem promoviranja poljoprivrednih i prehrambenih proizvoda,
- k) identificira i pomaže u razvoju i provođenju mjera uvozno-izvoznog režima i intervencije na tržištu.

Amandman VII.

Član 14. (Zadaci Uprave za harmonizaciju) briše se.

Amandman VIII.

U članu 15. stav (1) tačka b) u drugoj rečenici između riječi: ” pravnih i/ili fizičkih lica” brisati rastavni veznik “ili”,
u istom članu u stavu (5) između riječi: “ fizička ili pravna” briše se rastavni veznik “ili” i zamjenjuje sastavnim veznikom “i”.

Amandman IX.

U članu 17. riječ „Komitet“ u različitim padežima zamjenjuje se riječju „Odbor“

U istom članu u stavu (1) u tački h) riječi: “uspostavljanje sinergija” zamjenjuju se riječima: “ h) usklađenost u radu”, a preostali dio teksta nastavlja se.

Amandman X.

U članu 18. stav (1) iza riječi „ uspostavlja“ dodaju se riječi:“u saradnji s nadležnim organima entiteta i Brčko Distrikta BiH“.

Amandman XI.

U članu 19. stav (1) riječi: „Ministarstvo uspostavlja“ zamjenjuju se riječima: „osniva se“.

Amandman XII.

U članu 20. stav (3) riječi: „Uprave za harmonizaciju“ zamjenjuju se riječima:“ Ureda za harmonizaciju i koordinaciju sistema plaćanja”, a ostali dio teksta nastavlja se.

Amandman XIII.

U članu 21. stav (2) mijenja se i glasi:
 “Ministarstvo ima pravo određene zadatke povjeravati laboratorijama izvan BiH, ako takve ne postoje u BiH“.

Amandman XIV.

U članu 22. stav (1) riječi:” (u daljnjem tekstu: rezerve)” zamjenjuje se riječima: ”(u daljnjem tekstu: robne rezerve)” .

U istom članu u st. (2), (3), i (4) riječ “rezerve” zamjenjuje se riječima: ”robne rezerve” u različitim padežima.

Amandman XV.

U članu 23. stav (1) mijenja se i glasi:“ Ministarstvo, u saradnji s nadležnim organima entiteta i Brčko Distrikta BiH, uspostavlja sistem monitoringa i evaluacije BiH za sektor i slijede smjernice i najbolje prakse EU kojima se progresivno uvodi Zajednički okvir za monitoring i evaluaciju EU.“

Amandman XVI.

U članu 25. st. (2) i (3) mijenjaju se i glase:

„(2) Inspekcijski nadzor nad primjenom ovog zakona i propisa donesenih na osnovu njega obavljaju nadležni organi entiteta i Brčko Distrikta BiH posredstvom nadležnih inspekcijskih službi.

(3) Ministarstvo, u saradnji s nadležnim organima entiteta i Brčko Distrikta BiH, osigurava redovnu obuku inspektora i jedinstvenu primjenu procedura rada i mjera u sektoru poljoprivrede, ishrane i ruralnog razvoja u skladu sa zahtjevima integracije u EU.“

Dosadašnji stav (4) briše se, a stav (5) postaje stav (4).

Amandman XVII.

U članu 26. stav (2) iza riječi “sredstva” brišu se riječi: “po stupanju na snagu ovog zakona” i zamjenjuju riječima:“ u roku od godinu dana od dana stupanja na snagu ovog zakona.”

U istom članu u stavu (3) iza riječi: “druge propise” dodaju se riječi: “u roku od godinu dana”, a preostali dio teksta nastavlja se.

U istom članu u stavu (5) brišu se riječi: “po stupanju na snagu ovog zakona” i zamjenjuju riječima:“ u roku od godinu dana od dana stupanja na snagu ovog zakona.”

U istom članu stav (6) mijenja se i glasi: “Ministarstvo će, u saradnji s nadležnim organima entiteta i Brčko Distrikta BiH, započeti uspostavljanje poljoprivrednog tržišnog informacionog sistema u roku od godinu dana od dana stupanja na snagu ovog zakona“, a stav (7) briše se tako da dosadašnji stav (8) postaje stav (7).

Dosadašnji čl.15.,16.,17.,18.,19.,20.,21.,22.,23.,24.,25. i 26. postaju čl.14., 15.,16.,17.,18.,19.,20.,21.,22.,23.,24. i 25.

Ad. 7. Prijedlog zakona o izmjenama i dopunama Zakona o polaganju pravosudnog ispita u Bosni i Hercegovini (prvo čitanje) predlagač : Vijeće ministara BiH

U raspravi o ovoj tački dnevnog reda učestvovao je Božo Rajić.

Dom naroda jednoglasno je usvojio u prvom čitanju Prijedlog zakona o o izmjenama i dopunama Zakona o polaganju pravosudnog ispita u Bosni i Hercegovini.

Ad. 8. Prijedlog zakona o Agenciji za identifikacione dokumente, evidenciju i razmjenu podataka BiH (prvo čitanje), predlagač Vijeće ministara BiH

U raspravi o ovoj tački dnevnog reda učestvovala je Dušanka Majkić.

Dom naroda jednoglasno je usvojio u prvom čitanju Prijedlog zakona o Agenciji za identifikacione dokumente, evidenciju i razmjenu podataka BiH.

Ad. 9. Prijedlog zakona o izmjenama i dopunama Zakona o policijskim službenicima BiH (prvo čitanje), predlađač: Vijeće ministara BiH

Rasprava o ovoj tački dnevnog reda nije vođena.

Dom naroda jednoglasno je usvojio u prvom čitanju Prijedlog zakona o izmjenama i dopunama Zakona o policijskim službenicima BiH.

Ad.10. Informacija o stanju sigurnosti u Bosni i Hercegovini u 2007. godini

U raspravi o ovoj tački dnevnog reda učestvovali su: Dušanka Majkić, Slobodan Šaraba, Branko Zrno i Alma Čolo.

U prvom krugu glasanja Dom naroda, s devet glasova „za“ i četiri glasa „protiv“, nije primio Informaciju k znanju te se, zbog nepostojanja entitetske većine, pristupilo drugom krugu glasanja.

U drugom krugu glasanja, Dom naroda, sa osam glasova „protiv“ i pet glasova „za“, **nije primio** k znanju Informaciju o stanju sigurnosti u Bosni i Hercegovini za 2007.godinu.

Dom naroda Parlamentarne skupštine BiH usvojio je zaključke koje je predložila Zajednička komisija za odbranu i sigurnost:

1. „Prilikom izrade narednih informacija o stanju sigurnosti u Bosni i Hercegovini, Ministarstvo sigurnosti BiH treba primijeniti novu metodologiju izrade, čije osnovne sadržajne elemente definira, prije svega, Sigurnosna politika BiH, pri čemu informacija treba biti jasna i rađena jedinstvenom komparativnom metodom.
2. Prilikom izrade naredne informacije, Ministarstvo sigurnosti BiH treba utvrditi listu sigurnosnih prioriteta u Bosni i Hercegovini, te sačiniti prijedlog za njihovo rješavanje za određeni vremenski period, kako bi Parlamentarna skupština BiH mogla kontrolirati proces njihovog rješavanja. Zajednička komisija za odbranu i sigurnost BiH i PSBiH pružit će potrebnu podršku Ministarstvu sigurnosti BiH prilikom izrade kompletne informacije u dijelu koji se odnosi na potrebu intenziviranja saradnje svih institucija BiH i subjekata koji treba da učestvuju u njenoj izradi;
3. Prilikom izrade naredne informacije, Ministarstvo sigurnosti BiH treba detaljno obraditi i pitanje korupcije u BiH, te dati prijedlog mjera za borbu protiv takvog djelovanja;
4. Radi stvaranja boljih uslova za rad agencija za provođenje zakona u Bosni i Hercegovini, a time i boljeg sigurnosnog okruženja, treba razmotriti raspoložive mogućnosti za njihov smještaj u neperspektivne vojne objekte, te insistirati na što kraćem roku reguliranja pitanja prijenosa vlasništva nad njima;
5. Donošenje Strategije za borbu protiv neovlaštene proizvodnje i stavljanja u promet opojnih droga, te posjedovanje i omogućavanje uživanja opojnih droga treba biti prioritetan zadatak, te se naći na prvom mjestu u Informaciji;
6. Neophodno je da Vijeće ministara BiH što prije u parlamentarnu proceduru dostavi zakonske propise na nivou BiH o transportu i osiguranju većih količina novca i vrijednosnih papira. Također, potrebno je otkloniti uočene slabosti u zakonskim propisima iz oblasti sigurnosti uopće, kako bi se postojeće stanje popravilo;
7. Obavezuje se Zajednička komisija za odbranu i sigurnost Parlamentarne skupštine BiH da organizira poseban sastanak s ministrom sigurnosti BiH i njegovim zamjenikom, te direktorima sigurnosnih agencija BiH, uključujući i direktora BHMAC-a, radi sagledavanja problema navedenih u Informaciji o stanju sigurnosti i predlaganja određenih mjera za njeno prevazilaženje.”

Dom naroda usvojio je i zaključak koji je predložila delegat Dušanka Majkić koji glasi:

„Dom naroda Parlamentarne skupštine BiH traži od Ministarstva sigurnosti BiH da, u roku od 30 dana, sačini novu informaciju o stanju sigurnosti u Bosni i Hercegovini za 2007. godinu, s analizom stanja sigurnosti i prijedlogom mjera, te je dostavi na razmatranje Parlamentarnoj skupštini BiH“.

Ad. 11. Informacija o radu Tužilaštava BiH za 2007.godinu

U raspravi o ovoj tački dnevnog reda učestvovali su: Dušanka Majkić, Slobodan Šaraba, Alma Čolo i Ivo Miro Jović.

U prvom krugu glasanja Dom naroda, sa osam glasova „za“ i četiri glasa „protiv“, nije primio Informaciju k znanju te se, zbog nepostojanja entitetske većine, pristupilo drugom krugu glasanja.

U drugom krugu glasanja Dom naroda, s pet glasova „protiv“ i sedam glasova „za“, **nije primio** k znanju Informaciju o radu Tužilaštava BiH za 2007.godinu, ali je usvojio sljedeći zaključak:

„Dom naroda Parlamentarne skupštine BiH traži od Ministarstva pravde BiH da najhitnije donese strategiju i kriterije u prioritetima u procesuiranju predmeta krivičnih djela ratnog zločina“.

Sjednica je prekinuta u 20,15 sati.

Sjednica je počela u 16 sati.

Sjednicom je predsjedavao Sulejman Tihić, predsjedavajući Doma naroda Parlamentarne skupštine BiH.

Sjednici je prisustvovalo 11 delegata.

Delegati: Hazim Rančić, Slobodan Šaraba, Božo Rajić i Zoran Koprivica opravdali su odsustvo.

Osim delegata, na sjednici Doma naroda bili su predstavnici: Vijeća ministara BiH, međunarodnih organizacija i sredstava javnog informiranja.

Ad.12. Izvještaj o radu Pravobranilaštva BiH za period od 1.1.2007. do 31.12.2007.

U raspravi o ovoj tački dnevnog reda učestvovali su: Dušanka Majkić, Branko Zrno i Alma Čolo.

Dom naroda jednoglasno je usvojio Izvještaj o radu Pravobranilaštva BiH za period od 1.1.2007. do 31.12.2007.

Ad.13. Izvještaj o zaštiti ličnih podataka u Bosni i Hercegovini i o radu Komisije za zaštitu podataka za 2007. godinu

Rasprava o ovoj tački dnevnog reda nije vođena.

Dom naroda jednoglasno je usvojio Izvještaj o zaštiti ličnih podataka u Bosni i Hercegovini i o radu Komisije za zaštitu podataka za 2007. godinu.

Ad.14. Izvještaj o radu Ureda za razmatranje žalbi u 2007. godini

U raspravi o ovoj tački dnevnog reda učestvovala je Dušanka Majkić.

Dom naroda jednoglasno je usvojio Izvještaj o radu Ureda za razmatranje žalbi u 2007. godini sa sljedećim zaključkom:

“Zadužuje se Vijeće ministara BiH da, u okviru svojih zakonskih nadležnosti, preduzme potrebne mjere na otklanjanju problema u organizaciji rada i popuni Ured za razmatranje žalbi sa još dva člana, te da o preduzetim mjerama obavijesti Dom naroda Parlamentarne skupštine BiH.“

Ad.15. Izvještaj o radu i finansijski izvještaj Agencije za poštanski saobraćaj BiH za period od 1.1.2007. do 31.12.2007.

Rasprava o ovoj tački dnevnog reda nije vođena.

Dom naroda jednoglasno je usvojio Izvještaj o radu i finansijski izvještaj Agencije za poštanski saobraćaj BiH za period od 1.1.2007. do 31.12.2007.

Ad.16. Izvještaj o radu Upravnog odbora Izvozno-kreditne agencije BiH

Rasprava o ovoj tački dnevnog reda nije vođena.

Dom naroda jednoglasno je usvojio Izvještaj o radu Upravnog odbora Izvozno-kreditne agencije BiH sa sljedećim zaključcima:

1. „Usvaja se Izvještaj o radu Upravnog odbora Izvozno-kreditne agencije BiH za 2007. godinu.“
2. „Zadužuje se Vijeće ministara BiH da, s ciljem daljnjeg stimuliranja izvoza, razmotri mogućnosti povećanja finansijskih kapaciteta Izvozno-kreditne agencije BiH direktnom finansijskom podrškom i/ili izmjenama Zakona o Izvozno-kreditnoj agenciji BiH.“
3. „Zadužuje se Upravni odbor Izvozno-kreditne agencije BiH da u naredni izvještaj Parlamentarnoj skupštini BiH uvrsti informacije o privrednim granama i subjektima koji su koristili podršku Izvozno-kreditne agencije BiH.“

Ad.17. Godišnji Izvještaj Centralne banke BiH za 2007. godinu

U raspravi o ovoj tački dnevnog reda učestvovala je Dušanka Majkić.

Dom naroda jednoglasno je usvojio Godišnji izvještaj Centralne banke BiH za 2007. godinu sa sljedećim zaključcima:

1. “Zadužuje se Vijeće ministara BiH da, nakon usaglašavanja s entitetskim i kantonalnim vlastima, te vlastima Brčko Distrikta BiH, izradi strategiju i definiira poslovnu politiku i mjere s konkretnim rješenjima kojima će se: omogućiti monetarna stabilnost, stabilno i za investicije povoljno okruženje, ublažiti negativne (prijeteće) moguće visoke stope inflacije (veće od 5%), omogućiti povećanje domaćih i stranih investicija, povećati domaća proizvodnja, a naročito ona izvoznoorijentirana.“
2. “Zadužuju se nadležne komisije Parlamentarne skupštine BiH da, zajedno s Vijećem ministara BiH i nadležnim ministarstvima, u vezi s pitanjem deficita i inflacije, izrade prijedlog mjera, planova, programa i zakonskih rješenja za suzbijanje deficita i inflacije, kao

i prijedlog puta do suficita, kako bi sljedeći izvještaji Centralne banke BiH bili pozitivni i kako bi se na terenu osjetio napredak kod svih građana.“

3. “Obavezuje se Vijeće ministara BiH da, u roku od 90 dana, izradi analizu poslovnog okruženja u BiH, te kroz najšire konsultacije pripremi cjelovit program mjera i aktivnosti koje će omogućiti da BiH bude poželjno mjesto za investiranje, i za strane i domaće investitore.“

Ad.18. Finansijski izvještaj Centralne banke BiH za 2007. godinu

Rasprava o ovoj tački dnevnog reda nije vođena.

Dom naroda jednoglasno je usvojio Finansijski izvještaj Centralne banke BiH za 2007. godinu.

Ad.19. Razmatranje Programa mjera za primjenu Sporazuma CEFTA

Rasprava o ovoj tački dnevnog reda nije vođena.

Dom naroda jednoglasno je usvojio Program mjera za primjenu Sporazuma CEFTA sa sljedećim zaključcima:

1. “Usvaja se Program mjera Vijeća ministara BiH za primjenu Sporazuma CEFTA.“
2. „Zadužuje se Vijeće ministara BiH da jednom u pola godine izvještava Parlamentarnu skupštinu BiH o primjeni Sporazuma CEFTA, kao i o preduzetim ili planiranim mjerama na otklanjanju eventualnih teškoća i problema u njegovoj primjeni.“
3. „Zadužuje se Vijeće ministara BiH da Parlamentarnoj skupštini BiH dostavlja kvartalne informacije o robnoj razmjeni BiH s inozemstvom.“

Ad.20. Razmatranje izvještaja o radu komisija Doma naroda za 2007. godinu:

- 1) **Komisije za finansije i budžet,**
- 2) **Ustavnopravne komisije,**
- 3) **Komisije za vanjsku i trgovinsku politiku, carine, saobraćaj i komunikacije.**

Rasprava o ovoj tački dnevnog reda nije vođena.

Dom naroda jednoglasno je usvojio izvještaje o radu komisija Doma naroda za 2007. godinu.

Ad. 21. Davanje saglasnosti za ratifikaciju Okvirnog sporazuma između Bosne i Hercegovine Evropske investicione banke kojim se reguliraju aktivnosti Evropske investicione banke u Bosni i Hercegovini

Rasprava o ovoj tački dnevnog reda nije vođena.

Dom naroda jednoglasno je dao saglasnost za ratifikaciju Okvirnog sporazuma između Bosne i Hercegovine Evropske investicione banke kojim se reguliraju aktivnosti Evropske investicione banke u Bosni i Hercegovini.

Ad. 22. Davanje saglasnosti za ratifikaciju Sporazuma o saradnji u oblasti odbrane između Vijeća ministara BiH i Vlade Republike Grčke

Rasprava o ovoj tački dnevnog reda nije vođena.

Dom naroda jednoglasno je dao saglasnost za ratifikaciju Sporazuma o saradnji u oblasti odbrane između Vijeća ministara BiH i Vlade Republike Grčke.

Ad.23. Davanje saglasnosti za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austria Creditanstalt AG –projekat rekonstrukcije i proširenja vodovodnog sistema u općini Posušje

Rasprava o ovoj tački dnevnog reda nije vođena.

Dom naroda jednoglasno je dao saglasnost za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austria Creditanstalt AG –projekat rekonstrukcije i proširenja vodovodnog sistema u općini Posušje.

Ad.24. Davanje saglasnosti za ratifikaciju Ugovora o zajmu – Reorganizacija projekta obnove elektroenergetskog sistema – između Bosne i Hercegovine i Evropske banke za obnovu i razvoj

Rasprava o ovoj tački dnevnog reda nije vođena.

Dom naroda jednoglasno je dao saglasnost za ratifikaciju Ugovora o zajmu – Reorganizacija projekta obnove elektroenergetskog sistema – između Bosne i Hercegovine i Evropske banke za obnovu i razvoj.

Ad.25. Davanje saglasnosti za ratifikaciju Ugovora o amandmanu, kojim se vrše izmjene i dopune Ugovora o zajmu od 2. novembra 2000. amandmanima od 5. decembra 2001. i 23. februara 2004., između Bosne i Hercegovine i Evropske banke za obnovu i razvoj

Rasprava o ovoj tački dnevnog reda nije vođena.

Dom naroda jednoglasno je dao saglasnost za ratifikaciju Ugovora o amandmanu, kojim se vrše izmjene i dopune Ugovora o zajmu od 2. novembra 2000. amandmanima od 5. decembra 2001. i 23. februara 2004., između Bosne i Hercegovine i Evropske banke za obnovu i razvoj.

Ad.26. Davanje saglasnosti za ratifikaciju Konvencije o pristupu informacijama, učešću javnosti u odlučivanju i pristupu pravdi u pitanjima zaštite okoliša

Rasprava o ovoj tački dnevnog reda nije vođena.

Dom naroda jednoglasno je dao saglasnost za ratifikaciju Konvencije o pristupu informacijama, učešću javnosti u odlučivanju i pristupu pravdi u pitanjima zaštite okoliša.

Ad.27. Davanje saglasnosti za ratifikaciju Fakultativnog protokola uz Konvenciju protiv mučenja i drugih okrutnih, neljudskih ili ponižavajućih postupaka ili kažnjavanja

Rasprava o ovoj tački dnevnog reda nije vođena.

Dom naroda jednoglasno je dao saglasnost za ratifikaciju Fakultativnog protokola uz Konvenciju protiv mučenja i drugih okrutnih, neljudskih ili ponižavajućih postupaka ili kažnjavanja.

Sjednica je završena u 16, 40 sati.

Sastavni dio ovog zapisnika čini neautorizirani transkript 17. sjednice Doma naroda.

SEKRETAR
DOMA NARODA
Marin Vukoja, s.r

PREDSJEDAVAJUĆI
DOMA NARODA
Sulejman Tihić, dipl.iur., s.r.